

Per simplifitgar la finanziaziun dal turissem

■ **(anr/fa) Suentar il na a la lescha davart la taxa turistica (TAG) èn vischnancas e regiuns londervi a reve-der lur decrets en chaussa. L'incumbensa Caduff ha la finamira da metter a disposiziun in model da lescha.** «Diferentas vischnancas e regiuns vuessan simplifitgar la finanziaziun turistica cun tscherner in'otra basa per fixar la taxa che mo il dumber da pernottaziuns», declera *Marcus Caduff* (pcd, Lumnezia). La basa legala per fixar la taxa da cura e per promover il turissem è regulada en la lescha chantunala davart la taglia communal e da baselgia (LTGB). «Cun reveder questa lescha pudessan ins surdar a vischancas e regiuns interessadas in instrumentari modern per simplifitgar considerablaimain la finanziaziun dal turissem, p. ex. cun suttametter a la taglia

la capaciad enstagl da las pernottaziuns», cuntinua il deputà al cussegl grond. El e 59 ulteriuras deputadas e deputads incumbenseschan la regenza da suttametter al cussegl grond ina missiva per la revisiun parziala da la LTGB. Cun quella revisiun duain vegnir stgaffidas las basas chantunales per l'introducziun da taxas turisticas sco alternativa u complettaziun da las taxas da cura odiernas. «Las vischnancas duessan avair la pussaivladad da decider sch'ellas vuessan restar tar las taxas da cura e promoziun dal turissem actualas u introducir ina nova taxa turistica communal», menziuna *Marcus Caduff*, «a las vischnancas duai vegnir mess a disposiziun in model, in exempel da lescha cun las explicaziuns correspundentas per introducir questa taxa communal.»